

## Evening Dogri (NSD) Bulletin

28-06-2024

आकाशवाणी

खास खबरां

- नीट दे मतेयान च कथित बे—जाबतगिएं गी लेइयै विरोधी घड़ें आस्सेआ बरोध प्रदर्शन कीते जाने करी लोकसभा दी कारवाई दिन भर लेई स्थगित करी दित्ती गई।
- राज्यसभा च राष्ट्रपति हुंदे अभिभाषण पर धन्नबाद प्रस्ताह पर चर्चा शुरू होई।
- राष्ट्रीय परीक्षा अजेसी एनटीए च सुधारें सरबंधी सफारश देने लेई शिक्षा मंत्रालय आस्सेआ खडेरी गेदी उच्च सतह दी कमेटी नै सुधार ते परतियै गठन लेई विद्यार्थिएं ते उंदे मातात—पिता थमां सुझाह मंगे न।
- झारखंड हाई कोर्ट नै राज्य दे साबका मुखमंत्री हेमंत सोरेन होरें गी जमीन घोटाले कन्नै जुड़े दे मामले च जमानत देई दित्ती ऐ।
- आईसीसी टी-20 विश्व कप दे फाइनल च भारत नै थाहर बनाई। कल गुयाना च होए दे मैच च भारत नै इंग्लैंड गी 68 रंजें कन्नै हराया।

<><><><><><>

Lok Sabha-Rajya Sabha

नीट दे मतेयान च कथित बेजाबतगिएं गी लेइयै बरोधी घड़ें आस्सेआ बरोध—प्रदर्शन कीते जाने करी लोकसभा दी कारवाई दिन भरै लेई जिसलै के राज्यसभा दी कारवाई दपैहरी 2 बजे तगर स्थगित करनी पेई गई। दपैहरी 12 बजे तगर स्थगित रौहने परैत जिसलै लोकसभा दी बैठक फही लग्गी तां कांग्रेस दे सदस्यें इस मामले पर शिक्षा मंत्री धर्मेन्द्र प्रधान हुंदे स्तीफे दी मंग करदे होई नारेबाजी शुरू करी दित्ती। स्पीकर ओम बिरला होरें गलाया जे इस मामले दी जांच लेई इक कमेटी खडेरी गई ऐ। उनें आखेआ जे तैह ढंगै सिर संसद गी नेई चलन देना संसदी लोकतंत्र लेई ठीक नेई ऐ। नीट दे मामले पर चर्चा दी बरोधी घड़ें दी मंग गी नकारदे होई संसदी मामलें दे मंत्री किरिन रिजिजू होरें आखेआ जे राष्ट्रपति हुंदे सबोधन पर चर्चा दी अवधि दरान कुसै होर विशेष पर चर्चा दी इजाजत देने दी परंपरा नेई



बी पुलस थाने च एफआईआर ते पीड़ित गी एफआईआर गी मुफ्त कॉपी दित्ता जाना ते गिरफ्तारी दी सूरत च माहनुएं गी एह अधिकार दित्ता जाना बी शामिल ऐ जे ओह अपनी मर्जी मताबक कुसै व्यक्ति गी हालात बारे जानकारी बी देई सकोग। नमें कनूनें महिलाएं ते बच्चें खलाफ अपराधें दी जांच गी तरजीह दित्ता जाना ते दऊं म्हीनें दे अंदर सूचना दर्ज करिये बेल्ले सिर सबूरा करना बी शामिल ऐ। एआईसीटीई, सीएफआई सनें उच्च शिक्षा आले सब्बै इदारें बी पैहली जुलाई गी ध्याड़े भरै दिएं गतिविधिएं दा सरिस्ता करगंन जिंदे च सामूहिक चर्चा, सोआल जोआब आले सत्र ते बपार बगैरा दा आयोजन बी शामिल होग।

<><><><><><><><>

## MH Budget

महाराष्ट्र दे उपमुख्यमंत्री ते खजाना मंत्री अजित पवार होरें विधानसभा च मानसून सत्र दरान चालू माली ब'रे आस्तै अनुपूरक बजट पेश कीता। पवार होरें आखेआ जे बजट च करसानें, महिलाएं, युवाएं ते अल्पसंख्यकें दे कल्याण गी ध्यान च रखेआ गोआ ऐ। वित मंत्री होरें बजट च मुख्यमंत्री "माझी लाडकी बहन योजना" दी घोषणा कीती। एहदे तैहत 21 थमां 60 ब'रे दी उमरी दी पात्र महिलाएं गी हर म्हीने 15 सौ रपे दी माली सहायता दित्ती जाग। एहदे आस्तै 46 ज्हार करोड़ रपे दी राशि दित्ती गई ऐ। राज्य दी ढाई करोड़ थमां मती महिलाएं गी इस योजना थमां लाह होग।

<><><><><><><><>

## NTA Reforms

राष्ट्री परीक्षा अर्जेसी-एनटीए च सुधारें सरबंधी सफारशां देने लेई शिक्षा मंत्रालय आस्सेआ खडेरी गेदी माहिरें दी उच्च स्तरी कमेटी नै सुधार ते परतिये गठन लेई विद्यार्थिं ते चंदे माता-पिताएं कोला सुझाह मंगे न। इस कमेटी दी अगुवाई इसरो दे साबका अध्यक्ष डॉ. के. राधा कृष्णन होर करै करदे न। एह मशवरें ते प्रतिक्रियाएं गी mygov वैबसाईट दे राएं हासल करोग। आम लोक अपनी प्रक्रिया 7 जुलाई तगर दर्ज करोआई सकदे न। कमेटी गी आखेआ गेदा ऐ जे ओह मतेयानें सरबंधी प्रक्रिया, डेटा सुरक्षा सरबंधी नियमें च सुधार ते एनटीए दे ढांचे ते कारकरदगी च सुधार बारे अपनियां सफारशां दऊं म्हीने दे अंदर-अंदर शिक्षा मंत्रालय गी जमा करोआए।

<><><><><><><><>

## Education Minister

शिक्षा मंत्री धर्मेन्द्र प्रधान होरें नीट दे मेदवारें गी भरोसा दित्ता ऐ जे दोषिएं खलाफ सख्त कारवाई कीती जाग। संसद दे बाहर पत्रकारें कन्नै गल्ल करदे होई उनें आखेआ जे सरकार इस मुद्दे पर संवेदनशील ऐ। प्रधान होरें विद्यार्थिएं ते अभिभावकें गी भरोसा दित्ता जे लोडचदी सारी कारवाई कीती जाग। उनें आखेआ जे सरकार सदन च कुसै बी मुद्दे पर चर्चा लेई तैआर ऐ।

<><><><><><><><>

## Jharkand

झारखंड हाई कोर्ट नै राज्य दे साबका मुख्यमंत्री हेमंत सोरेन होरें गी जमीन घोटाले कन्ने जुड़े दे मामले च जमानत देई दित्ती ऐ। झारखंड मुक्ति मोर्चा दे कारजकारी अध्यक्ष सोरेन होरें गी प्रवर्तन निदेशालय नै रपे पैहे दे हेरफेर सरबंधी मामले दी जांच दे सिलसिले च इस बरे जनवरी म्हीने गिरफ्तार कीता हा। सोरेन होर इसलै रांची दी बिरसामुंडा जेल च बंद ऐ। हाई कोर्ट नै सोरेन हुंदी जमानत याचिका पर 13 जून गी अपना फैसला सुरक्षित रखेआ हा।

<><><><><><><><>

## NIA

राष्ट्रीय जांच अजेंसी एनआईए रक्षा मामलें दी जानकारी लीक होने कन्नै सरबंधत 2021 दे विशाखापत्तनम पाकिस्तानी इंटर सर्विसेज इंटैलिजेंस जसूसी मामले च शामिल संदिग्धें पर कारवाई करदे होई गुजरात ते महाराष्ट्र च त्रै थाहरें पर छापेमारी कीती। भारतीय रक्षा इदारें दी जसूसी करने आस्तै इनें लोकें गी पाकिस्तान थमां पैहा थ्होआ हा। छानबीन दरान मोबाइल फोन ते दस्तावेजें सनें केई सारी आपथतिजनक समग्री जब्त कीती गई। एनआईए ने जून 2023 च इस मामले गी अपने हत्थ च लेई लैता हा ते इक फरार पाकिस्तानी नागरिक सनें 2 आरोपिएं खलाफ आरोप पत्र दायर कीता हा। मगरा इक पाकिस्तानी नागरिक सनें 3 लोकें खलाफ 2 होर आरोप पत्र दायर कीते गे हे।

<><><><><><><><>

## EAM

भारत नै अंतर्राष्ट्रीय धार्मिक आजादी पर अमरीकी विदेश विभाग दी रिपोर्ट 2023 गी खारज करी दित्ता ऐ ते इसी बड़ा गै पक्षपात आला दस्सेआ ऐ। नमीं दिल्ली च मीडिया गी जानकारी दिंदे होई विदेश मंत्रालय दे प्रवक्ता रणधीर जयसवाल होरें आखेआ जे इसदे च भारत दे समाजिक ताने-बाने दी समझ दी कमी ऐ ते एह साफ तौर पर वोट बैंक दे विचारें ते इक निर्देशात्मक दुष्टिकोण थमां प्रेरित ऐ।

<><><><><><>

## New Forigen

1989 बैच दे भारतीय विदेश सेवा दे आईएफएस अधिकारी विक्रम मिस्त्री होरें गी अगले विदेश सचिव दे तौर पर नियुक्त कीता गेआ ऐ। ओह विनय मोहन क्वात्रा हुंदी थाहर लैंगन क्वात्रा हुंदा कार्यकाल अगले म्हीने दी 14 तरीक गी समाप्त होआ'रदा ऐ। मिस्त्री होर इसलै राष्ट्रीय सुरक्षा परिषद सचिवालय च उप राष्ट्रीय सुरक्षा सलाहकार दे तौर पर कम्म करा'रदे न। उनें चीन, म्यांमार ते स्पेन च भारतीय दूत दे तौर पर कम्म कीता ऐ। मिस्त्री होर त्रै प्रधानमंत्रिं 1997 च इंद्र कुमार गुजराल, 2012 च मनमोहन सिंह ते 2014 च नरेन्द्र मोदी हुंदे निजी सचिव दे तौर पर सेवा देई चुके दे न।

<><><><><><>

## PM-NR

प्रधानमंत्री नरेन्द्र मोदी होरें साबका प्रधानमंत्री पी.वी.नरसिम्हा राव होरें गी उंदी जयंति पर उनेंगी श्रद्धांजलि भेंट कीती। इक सोशल मीडिया पोस्ट च मोदी होरें आखेआ जे पी.वी. नरसिम्हा राव होरें गी उंदे नेतृत्व ते बुद्धिमत्ता आस्तै चेता कीता जाग। प्रधानमंत्री होरें आखेआ जे एह सरकार आस्तै सम्मान दी गल्ल ही जे उनें पी.वी.नरसिम्हा राव हुंदी देश प्रति उंदी सेवा गी सम्मानत करदे होई उनेंगी मरणोपरैत भारत रत्न दित्ता।

<><><><><><>

## NHRC-UP

मनुक्खी अधिकारें सरबंधी राष्ट्रीय आयोग एनएचआरसी नै ग्रेटर नोयडा च इक सीवेज उपचार संयंत्र दे अंदर त्रै मजदूरें दी कथित तौर पर मौत पर उत्तर प्रदेश सरकार गी नोटिस जारी कीता ऐ। मीडिया दी इक खबर पर आपूं संज्ञान लैंदे होई आयोग नै उत्तर प्रदेश दे

मुख्य सचिव ते पुलस महानिदेशक होरें गी इक हफ्ते दे अंदर अंदर व्यापक रिपोर्ट देने लेई गलाया। आयोग नै इनें मजदूरें दे परोआर आले गी सरबंधी अधिकारिएं आस्सेआ दित्ती गेदी राहत ते पुर्ववास दी स्थिति दा विवरण देने लेई गलाया। आयोग नै आखेआ जे मीडिया च आई दी खबर मूजब ओवरफलो होआ'रदे सीवर गी ठीक करने आस्तै सबमर्सिबल पंप दी मरम्मत करदे बेल्ले त्रै कर्मचारी इक आईटी कंपनी दे सीवेज उपचार संयंत्र च डुब्बी गे हे।

<><><><><><>

## Cricket

भारत नै आई.सी.सी टी-20 क्रिकेट विश्व कप दे दुए सेमीफाइनल च इंग्लैंड गी 68 रन्जें कन्नै हराइयै फाइनल च थाहर बनाई लैती ऐ। कल रातीं गुयाना च होए दे मुकाबले च इंग्लैंड नै पैहले टा जित्तियै गेंदबाजी दा फैसला लैता। भारत नै 20एं ओवरें च 7 विकेटां मुहाइयै 171 रन्ज बनाए। कप्तान रोहित शर्मा नै सब्बनें शा मते 57 रन्ज बनाए। बरखा करी प्रभावित होए दे मैच च सूर्य कुमार यादव नै 47 रन्ज ते हार्दिक पांडेया नै 23 रन्जें दी पारी खेड़ी। इंग्लैंड दी तरफा क्रिस जाइन नै 3 विकेटां जिसले के रीस टाप्ले, जोफरा आर्चर, सैम कुरन ते आदिल रशीद नै 1-1 विकेट लैती। 172 रन्जें दे लक्ष्य दा पिच्छा करदे होई इंग्लैंड दी टीम 16 ओवरें ते 4 गेंदें च गै ढेर होई गई। हुन फाइनल च भारती टीम दा मुकाबला कल बारबाडोस च दक्खन अफ्रीका कन्नै होग। भारती टीम त्री बारी टी-20 विश्व कप दे फाइनल च पुज्जी ऐ।

<><><><><><>

## Delhi Rail

श्री माता वैष्णो देवी दे दर्शन आस्तै जाने आले दे रश गी दिखदे होई उत्तर रेलवे नै कटरा आस्तै खास रेल चलाने दा फैसला कीता ऐ। एहदे च सामान्य, स्लीपर ते वातानुकूलित श्रेणी दे कोच लाए जांगन। एहदे कन्नै नियमित रेलें च कंफर्म टिकट नेई थहोने आले यात्रिएं दी परेशानी दूर होग। नमीं दिलली थमां एह खास रेल 3 जुलाई थमां 31 जुलाई बश्कार हर बुधवार ते ऐतवार रातीं 11 बज्जियै 45 मिंटे पर रवाना होइयै अगले दिन 4 बज्जियै 40 मिंट पर श्री माता वैष्णो देवी कटरा पुज्जग।

<><><><><><>

## Mann Ki Baat

प्रधानमंत्री नरेन्द्र मोदी ऐतवारें 11 बजे आकाशवाणी दे "मन की बात" कार्यक्रम राएं देश ते विदेश दे लोकें कन्नै अपने बचार सांझा करगंन। एह रेडियो कार्यक्रम दी 111मी किश्त होग। प्रधानमंत्री दा लगातार त्री बारी औहदा सांभने दे परैंत एह पैहली किश्त होग। इस कार्यक्रम दा प्रसारण सब्बने नेटवर्क आकाशवाणी ते दूरदर्शन, आकाशवाणी न्यूज वेबसाईट ते न्यूज ऑन एयर मोबाइल ऐप पर कीता जाग। एहदा लाइव प्रसारण ऑल इंडिया न्यूज दे यू-ट्यूब चैनलें, दूरदर्शन न्यूज, प्रधानमंत्री हुंदे दफतर ते सूचना ते प्रसारण मंत्रालय च होग। हिंदी प्रसारण दे तुरत मगरा आकाशवाणी आस्सेआ मकामी भाषाएं च एहदा प्रसारण कीता जाग।

<><><><><><>

Yatra

उपराज्यपाल मनोज सिन्हा होरें अज्ज बडलै भगवती नगर आले आधार शिविर थमां श्री अमरनाथ श्रद्धालुएं दे पैहले जत्थे गी श्री अमरनाथ जी दी यात्रा लेई झंडी दस्सियै रवाना कीता। उपराज्यपाल होरें श्रद्धालुएं गी सुरक्षत सफर आस्तै शुभकामनां दित्तियां न। उनें आखेआ जे बाबा अमरनाथ सब्बनें दी जिंदगिएं च शांति, खुशी ते समृद्धि लेइयै आवै। वैदिक मंत्रें दे नारें दी गूंज कन्नै 4 जहार 6 सौ 3 श्रद्धालुएं दे पैहले जत्थे गी भगवती नगर आधार शिविर थमां पवित्र गुफा लेई 231 निक्कियें—बडिडएं गडिडएं राएं झंडी दस्सियै रवाना कीता गेआ। इस मौके पर धार्मिक संगठन लोकें दे नुमायंदें सिविल प्रशासन दे वरिष्ठ अफसर, पुलस, सुरक्षा बल ते श्री अमरनाथ जी श्राईन बोर्ड दे आला अधिकारी, मन्ने परमन्ने दे नागरिक ते बद्ध गिनतरी च श्रद्धालु मजूद हे। 52 दिन चलने आली एह यात्रा दौनें रस्ते 48 किलोमीटर आले नूनवान—पहलगाम ते गांदरबल दे 14 किलोमीटर आले बालटाल आले रस्ते थमां चलोग ते 19 अगस्त शनिवार गी यात्रा सम्पन्न होई जाग।

<><><><><><>

